

आकाशवाणी

पैहले खास-खास खबरां:-

1. प्रधानमंत्री नरेन्द्र मोदी होर अज्ज अयोध्या च श्रीराम-जन्मभूमि मंदरें दे शिखर पर भगवा झंडा फैहरागंन- जेड़ा मंदर दा निर्माण कम्म पूरा होने दा प्रतीक ऐ।
2. प्रधानमंत्री होर कुरुक्षेत्र च श्री गुरु तेग बहादुर हुंदे साङ्डे त्रै सौंमे शहीदी दिवस दे मौके पर आयोजित इक विशेष कार्यक्रम च बी हिस्सा लैगंन।
3. छत्तीसगढ़ दे सुकमा जिले च 15 माओवादियें पुलसै दे सामने आत्म-समर्पण कीता ऐ।
4. इथोपिया च फटे दे ज्वालामुखी दे धुंए ते गुब्बार दे भारत आहली बकखी अगड़े बधदे गी ध्यानै रखदे होई- सिविल हवाबाजी निदेशालय नै ब्हाई कम्पनियें लेई विशेष सलाह जारी कीती ऐ।
5. भारत ते अफगानिस्तान नै कपड़े दे क्षेत्र च साथ-सहयोग बधाने दिएं संभावनाएं दे तौर-तरीके बारे चर्चा कीती।
6. ते भारत नै चीनी ताड़पे गी रहाड़यै उप्परोतली दुई बारी महिला कौडी विश्वकप अपने नां करी लैता ऐ।

<><><><><><><>

## PM-Ayodhya

प्रधानमंत्री नरेंद्र मोदी होर अज्ज उत्तर-प्रदेश दे अयोध्या च श्री राम जन्म भूमि मंदर जाइयै मंदरै दे शिखर पर रस्मी तौरा पर भगवा झंडा फहरांगन। एह रस्म मंदिर दा निर्माण कम्म पूरा होने ते सांस्कृतिक उत्सव ते राश्ट्री एकता दे इक नमें ध्याय दे शुरू होने दी प्रतीक ऐ। इस मौके पर प्रधानमंत्री होर उत्थे मजूद किट्ठै गी बी संबोधित करंगन। एह कार्यक्रम मंगगर म्हीने दे शुक्ल पक्ख दी शुभ पंजमी तित्थ, जेड़ा जे भगवान श्री राम ते माता सीता हुंदे ब्याह आहला अभिजीत महरत ऐ कन्नै होग। एहदे अलावा एह तित्थ सिखें दे नौमे गुरु श्री गुरु तेग बहादुर हुंदा शहीदी दिवस बी ऐ। उनें 17मीं शताब्दी च अयोध्या च 48 घंटे तगर निरंतर ध्यान कीता हा- जेहड़ा भगवा झंडा राम मंदर दे शिखर पर अज्ज फहराया जाहग, ओह 10 फुट उच्चा ते 20 फुट लम्मा ध्वज ऐ, जेहदे पर भगवान श्री राम हुंदे पराक्रम, यश ते तेज दे प्रतीक इक दीप्तिमान सूर्य दी छवि बनी दी ऐ ते एहदे पर कोविदारा बूहटे कन्नै ओम बी लिखेआ गेदा ऐ।

<><><><><><>

## PM- Kurukshetra

प्रधानमंत्री होर अज्ज संजा कुरुक्षेत्र बी जागंन ते गुरु तेग बहादुर जी हुंदे 350 में शहीदी दिवस दे चेतै च इक विशेष कार्यक्रम च हिस्सा लैगंन। कार्यक्रम दौरान मोदी होर पूज्य गुरु हुंदे 350 में शहीदी दिवस दे मौके पर इक विशेष सिक्का ते इक स्मारक डॉक टिकट जारी करंगन। अपने दौरै दौरान प्रधानमंत्री होर नमें बने दे इक भवन “पांचजन्य” दा उदघाटन बी करंगन- जिसी भगवान

श्री कृष्ण हुंदे पवित्र शंख दे सम्मान च बनाया गेदा ऐ। मगरा संजा मोदी होर देशे दे सब्भनें शा पवित्र तीर्थस्थले चा इक ब्रह्म सरोवर च दर्शन ते पूजा-अर्चना करगंन।

<><><><><><>

Rajnath -Gita

रक्षामंत्री राजनाथ सिंह होरें आखेया ऐ जे श्रीमद भागवत गीता दा संदेश छड़ा भारत गै नैई समूलची दुनिया च पूरी मनुक्खता लेई ऐ। कुरुक्षेत्र च आयोजित अंतराष्ट्रीय गीता सम्मेलन दौरान बोलदे होई रक्षामंत्री होरें आखेया जे गीता दे ज्ञान नै पीढ़ी दर पीढ़ी लोकें दे जीवन गी आकार देइयै केंइए दा उद्धार कीता ऐ ते अज्ज बी मते सारे नौजवान गीता दे ज्ञान कोला प्रेरत होइयै अपना जीवन सोआरा करदे न। अंतराष्ट्रीय गीता सम्मेलन दा सरिस्ता कुरुक्षेत्र युनिवर्सिटी-विदेश मंत्रालय ते कुरुक्षेत्र बोर्ड आसेया मिलिये सांझै तोरा पर कीता गेदा हा। राजनाथ सिंह होरें अग्गे आखेया जे 5 जहार बरे पैहले दिता गेदा गीता दा ज्ञान अज्ज बी मनुक्खता गी उबड़ा चुक्कने दा कम्म करै करदा ऐ। इस्सै बरे पैहलगाम च होए दे आतंकी हमले दा जिक्र करदे होई रक्षामंत्री होरें आखेया जे भारत रमानदारी दा हिमायती जरूर ऐ पर गलत गी बर्दाश्त करना बी ओहदी फितरत च नैई ऐ ते इस हिमाकत दा बदला भारत नै आप्रेशन सिंदूर दे रुपै च पूरी तगड़ेयाई कन्नै लैता हा।

<><><><><><>

Chattisgarh Maoists

छत्तीसगढ़ च प्रतिबंधित भारतीय कम्युनिस्ट पार्टीमाओ 15- मिम्बरें कल आत्मसमर्पण करी दिता। उं'दे पर तकरीबन 50 लक्ख रपें दा इनाम हा। इस समूह च दस मर्द ते पंज महिलां शामिल हियां। उनें सुकमा जिला पुलस मुख्यालय च पुलस अधीक्षक किरण चव्हान हुं'दे सामने आत्मसमर्पण कीता। इंदे च खूंखार पीपुल्स लिबरेशन गुरिल्ला आर्मी दे चार सदस्य बी शामिल न। मीडिया कन्ने गल्लबात च पुलस अधीक्षक किरण चव्हान होरें आखेआ जे कुख्यात माओवादी मडावी हिडमा दी हत्या दे बाद पैदा होए दे डरत्राह- गै दा एह -नतीजा

ऐ। उनें आत्मसमर्पण करने आहले हर इक जने गी पंजाह जहार रपेंs दी फौरन प्रोत्साहन दी घोशना कीती ते बाकी माओवादियें कन्ने बी हिंसा छोड़ने दी अपील कीती। छत्तीसगढ़ च इस ब'रे आत्मसमर्पण करने आले माओवादियें दी गिनतरी साइडे 6 सौ कोला मती होई गई ऐ। केन्द्र सरकार मार्च 2026 तगर माओवाद गी खत्म करने लेई दृढ़ संकल्प ऐ।

<><><><><><>

Ethiopia Volcano

कल रातीं इथियोपिया च ज्वालामुखी फटने करी धुंए ते गुबार दे बदल भारत दे उत्तर-पच्छमी राज्यें राजस्थान- गुजरात- महाराष्ट्र राश्ट्री राजधानी दिल्ली ते आले-दोआले दे इलाकें ते पंजाब च बी जाई पे। एहदे कन्ने दिक्खने च कमी आई ऐ ते इस गुबार दे पूर्व आहली बकखी बधने करी ब्हाई आमदोरफ्त बाधित होई गई ऐ। नागर विमानन महानिदेशालय नै कल एयर लाईनें ते ब्हाई अड्डें

लेई इस सरबंथै च दिशा-निर्देश जारी कीते न। इस दौरान अकास एयर- इंडिगो ते के.एल.एम. जनेही एयर लाईनें किश डोआरियां रद्द करी दितियां न। इथियोपिया चे हेली गुब्बी ज्वालामुखी तकरीबन 10 जहार बरें च ऐतवारें पैहली बारी फटेया ऐ। इन्नै लाल सागर ते पार ओमान ते यमन दी बक्खी बड्डे पैमाने पर गुबार भेजेया ऐ।

<><><><><><>

India- Afganistan

भारत ते अफगानिस्तान दे उच्ची सतह दे प्रतिनिधिमंडल नै कपड़ा क्षेत्र च बेहतर ते निग्गर साथ-सहयोग दी गुंजैश ते संभावनाएं दा पता लाने बारे चर्चा कीती ऐ। कपड़ा मंत्रालय नै आखेया ऐ जे अफगानिस्तान दे प्रतिनिधिमंडल नै नमीं दिल्ली च कपड़ा मंत्रालय दे बपार सलाहकार ए. बिपिन मेनन हुंदे नै मलाटी कीती। बैठक दौरान दौनें धड़ें आपसी सहयोग दे नमें रस्ते ते तौर-तरीके दे बारे च चर्चा कीती- जेहदे च अफगानिस्तान दे कपाह- करसाने लेई तकनीकी समर्थन- सिखलाई- शिपमेंट ते वीजा दी सुविधा ते दौनें मुख्यें दे उद्योग निकाएं बशकार नेइमा सम्पर्क शामिल ऐ। अफगानिस्तानी प्रतिनिधिमंडल दी अगुआई उन्दे आर्थिक मामले दे महानिदेशक शफी उल्लाह आजम करै करदे हे। प्रतिनिधिमंडल नै कपड़ा निर्माण लेई बेहतर माहौल ते बवस्था कायम करने- रोजगार दे मौके पैदा कराने ते कपाह ते कपड़ा मुल्ल श्रृंखला च दाखल होने आहले करसाने लेई सिखलाई सुविधां बधाने दी अफगानिस्तान दियें प्राथमिकताएं दी जानकारी दिती।

<><><><><><>

## Vaishnav Trains

केन्द्री रेल मंत्री अश्विनी वैष्णव होरें दिल्ली ते शामली बश्कार दंऊ MEMU रेल सेवाएं दी शुरुआत कीती। उत्तर-प्रदेश च बारउन बाघपत थमां झंडी दस्सियै रवाना कीती गेदियें इनें दंऊ MEMU रेलगड्डियें कन्नै- विद्यार्थियें ते रोज कम्मै पर जाने आहले लोकें गी सफर करने दा बेहतर ते सखल्ला विकल्प उपलब्ध होग- दंऊ इलाके बश्कार बेहतर सम्पर्क बनोग ते कन्नै इलाके च आर्थिक गतिविधियें गी बढ़ावा थहोग। इस मौके अपने सम्बोधनै च वैष्णव होरें आखेया जे इस रेल सेवा कन्नै रोज सफर करने आहलें- विद्यार्थियें- करसानें- कम्मकाजी लोकें ते होरनें गी मता फैयदा ते सहूलत होग।

<><><><><><>

## Kabaddi –India

भारतीय महिला कोडी टीम नै ढाका च चीनी ताइपे गी 35-38 कन्नै रहाइयै उप्परोतली दूई बारी महिला कोडी विश्व कप जितेया। भारत नै गुप स्टेज च सब्बै चार मैच जिते हे। सैमीफाईनल च भारतीय टीम नै ईरान गी 33-21 कन्नै रहाया हा। गुप-बी च अक्वल रेई दी चीनी ताइपे दी टीम नै बंगलादेश गी हराइयै फाईनल च अपनी थाहर बनाई ही। इस प्रतियोगिता च 11एं मुख्यें दिएं टीमें हिस्सा लैता। प्रधानमंत्री नरेन्द्र मोदी होरें इस जित पर भारतीय टीम गी मुबारकबाद दिती ऐ। प्रधानमंत्री होरें आखेया जे एह जित नौजवानें गी प्रेरित करोग।

